

Lonjakan digital pacu sasaran sumbangan e-dagang

Unjurian pertumbuhan sumbangan e-dagang sebanyak 20 peratus kepada ekonomi digital oleh MDEC dijangka mampu dicapai susulan situasi semasa yang menyaksikan lonjakan digital dalam kalangan usahawan dan perniagaan.

Naib Presiden Perniagaan Digital (Industri-bekalan), Gopi Ganeshalingam, berkata pada 2019, ekonomi digital telah menyumbang sehingga 19.1 peratus kepada Keluaran Dalam Negara Kasar (KDNK).

"Sektor seperti MedTech, Revolusi Perindustrian Keempat (4IR) dan Teknologi Agri akan menjadi pelopor pada 2021, menyumbang kepada kenaikan pendapatan digital," katanya.

Gopi berkata, ASEAN adalah antara ekonomi yang paling berkembang pesat di dunia dan menghubungkan serta mempro-

mosikan perniagaan teknologi Malaysia ke rantau ini, sebagai permulaan, akan menjadi satu dorongan yang hebat.

Beliau berkata, Malaysia sudahpun meneraju kedudukan kepimpinan dalam banyak sektor teknologi.

"Program eksport seperti GAIN MDEC mesti dipertingkatkan bagi mengukuhkan kedudukan Malaysia sebagai pusat ASEAN digital.

"Meningkatkan kemahiran dan melahirkan bakat digital yang baik amat penting untuk ekonomi digital terus maju," jelasnya.

Ekonomi gig pula sedang meningkat dan ia perlu dimanfaatkan dan diperkembangkan untuk kekal berdaya saing pada peringkat global.

"Program seperti GLOW membantu mereka yang memer-

lukan platform *crowdsourcing* untuk menjana pendapatan digital. Dalam tempoh Januari hingga Jun tahun lalu, GLOW sudah menjana pendapatan berjumlah lebih dari RM190 juta," katanya.

Sementara itu, menyentuh mengenai Dasar Ekosistem Kandungan Digital (DICE) untuk tempoh Jan hingga Jun 2020, ia telah disertai oleh 324 syarikat, mencatatkan pendapatan melebihi RM1.6 bilion dan jumlah eksport RM260 juta.

Untuk segmen e-dagang pula, Halatiju Strategik eDagang Negara (NESR) sudah membantu hampir 80,000 PKS menggunakan pa-kai e-dagang dan menolong sekitar 8,000 syarikat memanfaatkan e-dagang untuk eksport dalam tempoh Januari hingga Jun 2020.

Bagi *internet of things* (IoT), data MDEC menunjukkan dari Januari 2020 hingga Jun 2020,

Rangka Kerja Strategik IoT Nasional membantu mengumpulkan lebih daripada RM140 juta pelaburan, melibatkan 283 syarikat, sekali gus menjana pendapatan melebihi RM230 juta serta menghasilkan lebih daripada RM120 juta eksport secara keseluruhan.

Mengenai teknologi dron-Global Test Bed telah membabitkan 84 syarikat dan mengumpulkan pelaburan melebihi RM124 juta.

Ditanya sama ada pelaksanaan Dasar Keusahawanan Nasional boleh menjadikan Malaysia negara keusahawanan sejati menjelang 2030, Gopi berkata dasar itu perlu diterajui dan dipacu oleh pelbagai agensi kerajaan dengan digital menjadi penggerak utama.

"Paling penting, kerajaan perlu menerapkan transformasi digital dalam kementerian dan agensi masing-masing.

"Dasar dan peraturan perlu seiring dengan inovasi teknologi yang serba pantas dalam bidang seperti teknologi kewangan (fin-tech), 4IR, teknologi dron dan kecerdasan buatan (AI) dan kita perlu pastikan dasar ini inklusif dan memberi manfaat kepada semua," jelasnya.

Syarikat pemula Malaysia sudah bersedia untuk menjadi jaguh serantau kerana mempunyai semua sokongan yang diperlukan untuk menjadi peserta global.

"Syarikat teknologi Malaysia perlu terus berinovasi untuk kekal berada di hadapan.

"Syarikat Malaysia juga harus mula berfikir secara global. Jangan bangunkan penyelesaian untuk satu pasaran. Bangunkan untuk pasaran global dan mula menangani masalah global," tambahnya. BERNAMA